

每週經課朗誦經文(巴克禮漢羅/教羅)2012/09/09

共同經課 - 1 箴言二十二章一節~二節、八節~九節、二十二節~二十三節

1 好名聲 khah 贏-kè 大發財；恩惠 khah 好金銀。2 好額 sòng-hiong 相往來；lóng 是耶和華所創造。8 栽種罪惡 ê, beh 收災厄；伊受氣 ê 枋 beh 廢除。9 好心 ê 人 beh 得 tiòh 福氣；因為將伊 ê 米糧分 hō sòng-hiong 人。22 M-thang 搶劫 sòng-hiong 人 ê 物，因為伊 sòng-hiong；也 m-thang tī 城門口欺負困苦 ê 人。23 因為耶和華 beh 替伊伸冤；搶奪 in ê, 耶和華 beh 搶奪 hiah-ê 人 ê 性命。

共同經課 - 2 詩篇一百二十四篇、一百二十五篇

1 上崎 á ê 詩；大衛所做。1) 以色列 taⁿ tiòh 講，若 m̄ 是耶和華贊阮，2 若 m̄ 是耶和華贊阮，Tī 人起來攻擊阮，3 Tī in 對阮發受氣 ê 時，就將阮活活吞落去；4 Hit 時 chiah-ê 水的確 poāⁿ 過阮，河水的確淹密阮。5 凶狂 ê 水的確淹密阮。6 願耶和華受 o-ló, 因為伊無將阮做食物，交 hō in pō-食。7 阮 ê 性命親像鳥 á, 脫離掠鳥-ê ê 羅網；羅網破裂，阮就脫離。8 阮得 tiòh 幫贊，是靠耶和華 ê 名，伊是創造天地 ê。1 上崎 á ê 詩。1) Oá 靠耶和華 ê 人，親像永永 khiā 在，boē 搖 choah ê 錫安山。2 眾山包圍耶路撒冷，耶和華亦 án-ni 包圍伊 ê 百姓；Tùi chit-tiáp 到永遠。3 罪惡 ê 權柄 boē 定定 tī 義人 ê 份額；免得義人伸手做 pháiⁿ。4 耶和華 ah, 求你好款待 hiah-ê 做好 ê, 以及心正直 ê 人。5 論到 hiah-ê 歪 chhoah, 行伊彎曲 ê 路 ê 人，耶和華的確 hō in kap 做 pháiⁿ ê 人同等。願平安歸 tī 以色列。

共同經課 - 3 雅各書二章一節~十節、十一節~十三節、十四節~十七節

1 我 ê 兄弟 ah, lín 守咱 ê 主耶穌基督榮光 ê 主 ê 信, m̄-thang 用外貌取人。2 若有人掛金手指, 穿 súi 衫, 入 lín ê 會堂, 也有 sòng-hiong 人穿破爛 ê 衫平平入, 3 lín 就看穿 súi 衫 ê, kā 伊講, 你坐 chit-ê 頂位；也 kā sòng-hiong ê 講, 你 khiā hit 位, á 是坐我 ê 腳踏椅下；4 這 kiám m̄ 是心內有 cheng-choah, 用 pháiⁿ 念頭來分別 mah? 5 我所疼 ê 兄弟, tiòh 聽 ah；上帝 kiám m̄ 是揀世間 sòng-hiong ê, hō in tī 信做好額, 來承接伊所應允 beh hō 疼伊 ê 人 ê 國 mah? 6 但是 lín 就凌辱 sòng-hiong 人。富人 kiám m̄ 是脅制 lín, 家已拖 lín 到審判廳? 7 Kiám m̄ 是謗瀆 lín 所 hō 人叫尊貴 ê 名 mah? 8 照聖經所記載, Tiòh 疼厝邊親像家已, lín 若守 chit-ê 至好 ê 法到盡, chiah 是好。9 獨獨 lín 若用外貌取人, 就犯罪, hō 律法定做犯法 ê。10 因為見若全守律法, 也 tùi 一條跋倒, 就是犯 tiòh 眾條。11 因為講, 莫得姦淫 ê, 也講, 莫得 thài 人。若 lín 無姦淫也有 thài 人, 是做犯 tiòh 律法 ê 人。12 Lín 既然 beh 照 hō 人自由 ê 律法受審判, 就 tiòh 照 án-ni 講, 照 án-ni 行。13 因為人無憐憫人, 當審判也無得 tiòh 憐憫；憐憫贏過審判來誇口。14 我 ê 兄弟 ah, 人講有信, 也無行, 有甚麼利益? Chit 號信能救伊 mah? 15 若有兄弟 á 是姊妹無 thang 穿無 thang 食, 16 lín 中間有人 kā in 講, Thang 安然去, 願 lín 穿燒食飽, 也竟然無用身軀所欠用 ê hō in, 有甚麼利益? 17 Án-ni, 信若無行, 就家已是死。

共同經課 - 4 馬可福音七章二十四節~三十七節

24 耶穌 tùi hia 起身, 去到 Chhui-lò Se-tùn ê 交界, 入一間厝, m̄ ài 人知；但是 khng boē 密。25 Liám-piⁿ 有一個婦人人, 伊 ê 細漢 cha-bó-kiáⁿ hō 邪神附身, 聽見耶穌 ê 事, 就來仆 tī 伊 ê 腳下。26 Chit-ê 婦人人是 Hi-lī-ní 人, 屬 Sū-lī-hui-ní-ki ê 族；伊求耶穌趕鬼離開伊 ê cha-bó-kiáⁿ。27 耶穌 kā 伊講, Tiòh hō gín-ná 事先食飽；因為 thèh gín-ná ê 餅 hiat hō 狗是 m̄ 好。28 婦人人應伊講, 主 ah, 是 lah；總是桌腳 ê 狗也食細 kiáⁿ ê 餅碎。29 耶穌 kā 伊講, 因為 chit 句話你 thang tò 去, 鬼已經離開你 ê cha-bó-kiáⁿ 出去。30 婦人人 tò 去 in tau, 看見 cha-bó-kiáⁿ 倒 tī 眠床, 鬼已經出去。31 耶穌 koh tùi Chhui-lò ê 境界, 經過 Se-tùn, tùi Te-ka-pho-lī 境 ê 中央, 到加利利海。32 有人 chhoā 一個臭耳人 koà tiuh 舌根 ê 就近伊, 求伊 kā 伊 hoāⁿ 手。33 耶穌 chhoā hit 人離開眾人到邊頭, 就用指頭 á 探伊雙 pêng ê 耳孔, koh phui-hoā 來摸伊 ê 舌, 34 ñg 天吐氣, kā 伊講, Í-hoat-tāi, 就是講, 開。35 伊雙 pêng ê 耳孔就開, 舌根也 tháu, 講話明明。36 耶穌警戒 in 莫得 kā 人講；總是 ná 警戒, in ná 報揚。37 也不止奇怪講, 伊所做 lóng 是好, hō 臭耳人 ê 聽見, 啞口 ê 講話。